



Jumat, 18 Nopember 2022

Ogen: 1 Johanes 2:10-12



Engkelengi Senina



Adi nderbih kita ngerana kerna keluarga inti, e me se isi jabu: bapa, nande ras anak, sekali enda kita ngerana kerna keluarga si erkawiten ras senina ras turang, subuk e senina si sada bapa ras nande, senina sembuyak bapa entah senina ras turang sipemerren. Senina ras turang eme temanta arih i bas ndalani erbage-bage kegeluhen si man alanken. Uga pe kecibal geluhta, man senina e lebe ituriken. Senina e nge temanta tawa, e ka nge temanta tangis. I bas susah ras senang si man alanken ku senina e nge lebe kita ngadu-ngadu.

Renungenta enda nuriken kerna kalak si engkelengi senina, ibas terang kap ia nggeluh, tapi kalak si nembek atena seninana, i bas gelap kap ia. Johanes ngerana kerna terang ras gelap. Terang e biak Kristus ras gelap e biak doni si la nerpengue nandangi sura-sura Kristus. Kalak si nggeluh i bas kristus, iasuhina perdamen. La ia ngit rubat ersenina ras erturang sabap Kristus ringan i bas pusuhna. Kristus si ngajar-ngajari ia uga kin arusna ersenina ras erturang. Nggit surut, nggit, erlarjar, erpersukuten ras siergan. Tuhan erngena ate man kalak si nggeluh i bas perdamen. Tapi, adi nembek ateta seninanta entah kai gia sabapna, situhuna siikutken denga sura-sura si gelap. Iblis erngena ate man kalak si la nggit erkuan, ras man kalak si langgit erdame.

Nina Presiden Jokowi, *'hal yang paling membahagiakan adalah keluarga, sayangi keluarga apapun perbedaannya*. Ersenina e malala nge si la seri ras kita, subuk biak, karakter, pendahin, ekonomi, bage pe kinitekennta. Tap ula min faktor si e erbahansa sirang perkade-kadenta. Entah erkiteken perbagin tading-tadingen maka kita lanai ersenina ras erturang. Kepeken i bas litna senina ras turangta nge situhuna maka kita mehaga. Itamaken Tuhan kita i bas doni enda lako encidahken geluh sikeleng-kelengen.